

**Protocol fat bun da la radunanza cumünala dals 16 gün 2010****Protocol no. 6**  
**Radunanza cumünala dals 17 december 2009, 20.15 – 23.15**

Preschaintas: 29 personas

S-chüsats: Marianne Werro, Cla Sarott ed Andri Pua

Il capo constata cha la radunanza saja gnüda convochada in basa a nossa constituziun cumünala e dumonda sch'inchün haja da far objecziuns. Sainza chi vegnan fattas objecziuns, vegnan nominats seguaints scrutinadurs: Maria Sedlacek e Men Caviezel.

**Protocol**

Il protocol no. 5 da la radunanza cumünala dals 29 settember 2009 vain approvà.

**1 9 FINANZAS ED IMPOSTAS**  
**Fixar il pè s'impostas cumünalas pel 2010**

Il Cussagl cumünal propuona a la radunanza cumünala da sbassar il pè d'impostas per 10 % sün nouv 120 % da l'imposta chantunala simpla. Da la vart da l'egualisaziun da finanzas sun asgürats fr. 167'000.-- schi nu's sbassa las impostas daplü co 10 %. Ün sbassamaint plü grond vess la perdita da quist import per consequenza.

La radunanza cumünala fixa in scrutin avert, sainza cuntravuschs, il pè per tuottas impostas cumünalas pel 2010 sün 120 % da l'imposta chantunala simpla.

**2 9 FINANZAS ED IMPOSTAS**  
**Preventiv da la gestiun cumünala pel 2010**

Il capo e schef da finanzas e'ls respunsabels pels differents decasteris orienteschan concernent il preventiv preschantà. Plüssas remarchas e dumondas vegnan respusas e tuttas a cogniziun.

La radunanza cumünala decida in scrutin avert, cun gronda majorità da vuschs, sainza cuntravusch, da far bun il preventiv cumünal pel 2010 sco preschantà chi muossa pro entradas da fr. 7'623'650.-- e sortidas da fr. 7'744'230.--, ün s-chavd da fr 120'580.--.

**FINANZAS ED IMPOSTAS**  
**Preventiv d'investiziuns pel 2010**

Il capo orientescha a la radunanza cumünala cha culla müdada da la constituziun sun investiziuns büdschettadas e fattas bunas da la radunanza sancziunadas per tillas realisar. Quist sistem es uossa nouv per Sent, però üsità in Grischun. Perquai vegnan las investiziuns preschantadas per gronda part fingià in detagl.

Ils respunsabels pels differents decasteris orienteschan detagliadamaing concernent il preventiv d'investiziuns pel 2010. I seguan plüs votums, tanter oter vain augmantà per fr. 20'000.-- l'investiziun previssa per la salaschada da Plaz sün nouv fr. 130'000.--. Andit da discussiun dà il proget da la chamonna Darsüra. Dumeng Jann fa la proposta da vuschar in scrit sur da l'investiziun previssa. La radunanza cumünala decida in scrutin serrà, cun 15 cunter 11 vuschs (vödas 1) cha quel proget nu dess gnir realisà.

Dumeng Jann nun es perinplet cul möd descrit aint illa constituziun cumünala a regard investiziuns previssas aint il preventiv. Tenor el vegnan las investiziuns decissas massa svel. El vuol chi's stübgia da müdar danouvmaing la constituziun cumünala.

Il capo declera cha'l möd saja per Sent nouv e cha la populaziun stopcha survgnir amo ün pa rutina per ir intuorn cun quist instrumaint. Blers oters cumüns han eir in man quel sistem (vair l'andamaint da la radunanza da preventiv d'incuort a Scuol). La radunanza cumünala decida in scrutin avert, cun gronda majorità da vuschs da far bun il preventiv d'investiziuns pel 2010 cullas müdadas manzunadas survart. Il preventiv muossa pro sortidas da fr. 2'387'000.-- ed entradas da fr. 1'888'500.--, ün' investiziun netta da fr. 498'500.--.

**Varia****Allontanamaint da saivs**

Christian Poo remarcha chi nu sajan gnüdas allontanadas tuot las saivs electricas per sur inviern e cha quai saja per la sulvaschina privlus. Impustüt quellas aint in Sursass chi vegnan installadas dals da Mals sun amo in pè. Il capo piglia l'infuormaziun incunter ed ils pertocs gnaran fats attent lasupra.

L'actuar: